



24. februar 2012

Inatsisartut Suleriaasianni § 37 naapertorlugu Naalakkersuisunut apeqqtu imaattoq matumuuna saqqummiuppara:

Naalakkersuisunut apeqqtu:

1. **Iluoorpa meeqqat atuarfianni ilinniartitsisut tunngaviusumik alloriarfinni pingasuusuni ataasiinnarmut attuumassuteqartartut aamma taamaattoqarsimappat tamatumunnga suna pissutaava ?**

(Inatsisartunut ilaasortaq Andreas Uldum, Demokraatit)

Tunngavilersuut

Pappiaqqami allasimatillugu iluarisimaarnarpoq, meeqqat atuarfianni ilinniartitsisoq ilinniartitsissappat taamaallaat alloriarfimmi ataatsimi. Meeqqat atuarfiani atuartunik atuartitsinermi suliassat allanngoriartortarput atuartut ukioqortusiartortillugit tamannalu tunngavigalugu paasinarluarpoq, ilinniartitsisoq alloriarfimmi ataatsimi immikkut piginnaanngorsartassappat.

Silarsuarmili piiviusumi pissutsit allarluinnaapput. Piviusuuvoq meeqqat atuarfianni ilinniartitsisut piginnaasaqarluartut amingaataammata.

Ilinniartitsisut kattuffiata IMAK-ip Aningaasaqarnermut Siunnersuisoqatigiit nalunaarusiami 2010-meersumi tamanna nammineq oqaatigaat, tassani tusarniaanermut akissummini kattuffik allammat:

”Taamaammat IMAK’ip kaammattuutigissavaa atuarfiit fagini atuartitsisunik sammisatigut piginnaasaqartunik ingerlatsinissartik eqqumaffiginerulertariaqaraat atornissaallu salliutitalissallugu”.

Tusarniaanermut atatillugu akissummi tassani IMAK-p misissuisimaneq innersuussutigaa, tassani erseqqilluinnartumik uppersarnermat, meeqqat atuarfianni atuartut akulikippallaamik ilinniartinneqartartut ilinniartitsisumit ilinniartitsissutigisaminut fagimut immikkut piginnaanngors-



arsimangitsunit. IMAK-p naatsorsorpaa, fagit 33 %-anni taamaallaat meeqqat atuartut ilinniartitsisunit ilinniartitsissutigisaminut piginnaasaqarluartumit atuartinneqartartut. Tassa imaappoq, fagit 67 %-iini ilinniartitsisoqartarpoq, ilinniartitsisunit fagimut ilinniartitsissutigisarminnut naammattumik piginnaasaqanngitsunit.

Minnerunngitsumik kisitsisit ernummatigisariaqarmata Demokraatini isumaqarpugut sapinngisamik annerpaamik qulakkeerneqassasoq, ilinniartitsisut tamarmik meeqqat atuarfianni alloriarfinni pingasuni tamani ilinniartitsisassasut fagini immikkut piginnaangorsarfigisimasaminni.

Demokraatini isumaqarpugut, pitsaanerussasoq, atuartut atuartinneqartarpata ilinniartitsisunit ilinniartitsissutigisaminut immikkut piginnaangorsarsimasunit, piginnaangorsarsimangitsumut naleqqiullugu. Kingunerissavaa ilinniartitsisut alloriarfinni tamani ilinniartitsisinnaangornissaat, Demokraatinilu isumaqarpugut maannamut naleqqiullugu aaqqiissutaassasoq pitsaernerusoq, maannakkummi atuartorpassuit ilinniartinneqartarmata ilinniartitsisunit eqqortunik piginnaasaqanngitsunit.

Ullut sulliviit naliginnaasut qulit iluanni akissutisinissara qilanaaraara.